

拈栳 (lā-pue) 佻虱目仔

■ 甘露

日頭又欲沉落海矣，一隻拈栳倚佇海茄苳頂面向 (ng) 海，伊烏烏長長閣扁扁的喙，予欲落海的日頭光染做烏 tò 紅仔烏 tò 紅。這個時陣，有一陣北風對 (tùi/ùi) 北片吹來，共拈栳頭殼頂長長的烏仔毛搨 (siàn) 甲敲 (khi) 一片 (pîng)，毋過這隻拈栳一屑仔都毋驚寒，目睭全款掠日頭金金相。

「五秒、四秒、三秒、兩秒、一秒，沉落去。今仔日這擺是上尾一擺佇遮算秒矣，明仔載就欲上北轉去北方矣，毋知十月我閣轉來的時陣，遮的自然環境會變做按怎？毋過我會當確定，時到日頭光全款會共我的喙染做我上佻意的烏 tò 紅。」拈栳那相日頭，喙裡那咧唸。講煞，隨對魚塭 (ùn) 仔遐飛去。

「È-î，下跤彼窟魚塭仔有飼虱目仔，mh！頭拄仔才咧練飛，飛甲腹肚足枵的，來抽兩尾仔好料的，明仔載毋才有氣力飛轉去北片。」拈栳對天頂飛落來的時陣，看著水池仔內發生一件誠心適的代誌。

虱目仔講：「He~he~，叫我第一名！叫我第一名！」原來是一隻生做無甲佻大隻的虱目仔，搶佇魚陣的上頭前咧泗來泗去。拈栳講：「第一名？hng！你愛出頭做第一，好！我欲食嘛共你食第一！」講煞，隨共虱目仔對水--裡啄 (tok) 起來。

虱目仔講：「Aih-iah……aih-iah，緊共我放轉去啦，共我放轉去啦，老五--的！」

拈栳捎無總 (tsáng) 講：「老五--的？你是咧叫啥人 (siáng)？啥人是老五--的？」

「就是你啊！你就是老五--的啦！」虱目仔緊應話。

拈栳講：「莫烏白講！欲死矣閣無正經！」

「啥物咧無正經！我叫你老五--的，當然有道理啊，這幾工你佻恁彼陣拈栳朋友練飛的時陣，你攏綴 (tuè) 佇第四隻後壁，我佇水裡斟酌看真久矣，袂看毋著啦！老五--的，老五--的，嘻~嘻~，無膽的才做老五--的……」虱目仔用話共著激，想講看有機會會當旋 (suan) 去無。

拈栳中計，氣怱怱講：「好！予你看甲遮無夠重，今仔日先饒你一命，明仔載我飛第一予你看。」拈栳講煞，喙開開，共虱目仔放轉去水裡，氣掣掣 (tshuah-tshuah) 就飛走。

節錄自臺灣閩南語朗讀文章選輯第 014 篇